

張文襄公奏議

張文襄公全集卷十七

奏議十七

財政艱窘分擬辦法摺

光緒十二年五月二十二日

竊照承准軍機大臣字寄光緒十一年五月初八日奉上諭現在海防善後用項浩繁必須通盤籌畫核實經理方足以裕度支而紓國用各該省關每年所入之款究竟實有若干其常年例需及現在添支防勇局卡餉需薪水各款實在費用若干此後常年可以裁減歸併節省之款若干各該將軍督撫監督等切實核計逐款分晰開單限於奉旨一月內詳細奏報毋得稍涉含混

藉詞延緩將此由六百里諭知各直省將軍督撫並傳諭粵海關監督知之欽此當經轉行欽遵嗣因藩運兩庫款項繁多其中有無可以裁省之款亦須行查登覆前項款單難以依限開造奏明展限辦理隨准戶部咨部頒冊式飭令造報歲出歲入係指已經開支之實在數目而言五月初八日上諭係指十一年以後支款應裁併節省而言本非一事飭於本年三月內將光緒八九十三年歲出歲入款冊照式填造至奉旨裁併節省之款亦不得以裁併此次海防暫用之款搪塞了事等因本年三月初四日欽奉寄諭上年八月間欽奉 慎

禧端佑康頤昭豫莊誠皇太后懿旨通飭各直省督撫  
裁勇節餉從光緒十二年起每省每年可得若干奏明  
專款存儲解部備用限於十一年十一月內定議覆奏  
嗣據各該省陸續奏到惟廣東省至今尙未覆奏此項  
銀兩係於常年部撥各款外專案飭令籌撥前議旗兵  
加餉關繫根本至計現在王公官員俸銀及旗綠各營  
餉銀均照舊制全數放給需款尤鉅該督撫自應力顧  
大局設法撙節專款解部究竟該省可籌若干著張之  
洞倪文蔚竭力籌措務於每年應解京協各餉外籌定  
數目迅速覆奏不得以無可報解等詞一奏塞責至庫

款出入數目該督撫於上年九月間奏請展限現又將屆半年仍未奏報並應速行詳查開單具奏將此由四百里各諭令知之欽此又經轉行欽遵飭催造報去後茲據署廣東布政使蕭韶署兩廣鹽運使蔣澤春會同善後釐務各局司道詳稱粵省藩運兩庫每年入款合地丁太平關稅田房雜稅鹽課貨釐一切雜款並海關撥款洋藥釐餉等項暨新增之弛禁捐款另捐之洋藥防費膏釐綜計所入不過四百五十餘萬兩至於每年出款略分五類一常年例支如本省旗綠俸餉糧料文武養廉解部料價部飯州縣坐支之類是也一部撥餉

項如京餉加餉東防籌邊固本備荒京員各省協餉是也一舊案添支如十年以前原有勦匪防黎勇營軍餉及巡緝兵勇口糧旗營津貼輪船扒船薪糧局卡經費各項工程之類是也一新案添支如近年續增水陸防軍之薪糧軍火之尾欠軍械礮臺河道之工程水雷魚雷雷艇電綫製造等局匪鄉勘界各經費之類是也一籌還洋款如代還西征借款本省兩次借款滇桂寶源借款是也大率例支銀二百一十六萬七千餘兩舊案添支一百三十四萬六千餘兩新案添支銀一百三十萬七千餘兩舊案率爲緝捕勦匪防黎新案專爲海

防此三宗皆爲本省用度部撥並催提舊欠京協各餉  
一百六十七萬三千餘兩洋款一百一十一萬五千餘  
兩綜計出款共約銀七百六十一萬九千餘兩以收抵  
支計不敷銀三百零五萬四千餘兩此粵省預計本年  
收支之實在情形也查粵省雖稱蕃庶從前地方平靖  
入款不過額收了課出款不過額支餉需源足流簡歲  
收歲支亦僅敷用每有大事無非取給紳商捐輸自商  
岸通而洋行歇香港盛而富商移引埠懸水客招而鹽  
綱散咸豐軍興以來防協各款愈增愈多然而內寇零  
匪土兵器械所需不鉅至光緒六年始有海防之議略

加籌度未及大舉光緒九年越事既起邊海俱防需款浩大以致藩運兩庫悉索靡遺挪用墊發寅支卯款歷年綜核收支不敷甚鉅所幸沙田行戶鹽埠等項尙可隨時籌捐各省協款亦視本省財力酌盈劑虛尙無需解足十成此中挪展後先藉資敷衍現在京協各餉部催緊迫皆須實解迥非從前各省協餉之比各項洋款不能逾期而本省界務孔棘邊海俱籌盜匪方熾客黎未靖除新增防勇節次裁撤一百餘營外其餘礙難盡數裁併所有留防之軍餉善後之經費巡緝辦匪遣勇防黎勘界諸費外洋軍械之尾欠皆爲必不可少之需

此外年例支銷各有占定額數局卡各費俱經節次裁  
刪以目前用款論之併省實不爲少而所需仍復不貲  
固無餘存仍多鉅欠至本省舊有入款除丁課正賦申  
嚴定章實力督徵大率歷年無甚出入外近年因海防  
倥偬來往兵勇官差過多加以水災釐金減色復因港  
澳走私他族庇送藥餉鹽務受累日深現在多方整頓  
剔弊緝私以後僅可不致短絀若新籌入款則所有捐  
款於冬間悉經停止沙田升科收效尙遠爲數亦不能  
甚多鑛務雖已開局招商收效在七八年以後前請留  
實官捐輸稍資補苴未知能否邀准旣無鑿空生財之

方亦無百事俱廢之理仰屋蒐索焦灼萬分實不知所  
以爲計該司道等反覆籌議惟有將出入不敷情形懸  
陳請奏以備戶部裁度然僅備陳支絀而不勉籌一支  
持騰展之法徒致上煩宸慮卽部臣亦難代謀必致往  
復瀆陳貽誤事機竊擬分爲三項辦法一爲節省現將  
防勇練兵輪船製造及一切各費並藩運兩庫常年例  
支竭力裁併大約防營可省三十餘萬他項舊案新案  
添支項下及一切雜費可省二十餘萬常年例支項下  
可省約三萬通計可節省約五十六萬至於外銷各項  
極力裁汰以之湊補正項急需者不下三四萬尙不在

此數內一爲請緩擬將部撥催補京協各款酌量緩急  
請旨分別暫准緩解減解帶解抵解免解俟粵力稍蘇  
陸續籌補或俟光緒十四年以後補解或俟光緒二十  
一年以後補解所擬緩籌之數大約二十餘萬如蒙俯  
准亦可暫紓眉急以後儻能籌措應手稍可敷用仍當  
自請酌量增解不敢推諉一爲奏請另籌除實捐一項  
懇准留用外現擬將巡緝經費一項就地籌捐此兩項  
數難預定大約少則二三十萬多則五六十萬並擬催  
收紳富已捐未繳各款暨將寶源洋款兩年尾數二十  
餘萬兩本省洋款按年十萬兩一併懇請改撥粵海關

籌還准其分抵應解本省俸餉防費舊欠旗綠兵餉新撥之款統計節省請緩另籌三項共一百七八十萬兩此外尙短銀一百萬兩以外實無設措之術如果籌有辦法再當詳奏辦理其糧道庫各款每年例支皆有不敷無關通省度支大局謹就本年正月現存兵勇實數並各項用款就三年內酌中核計并將議擬三項辦法繕列清單詳請具奏前來臣等詳加覆核其出入相懸不敷太鉅委係實在情形竊惟庫款支絀各省所同而粵省所以虧短尤多窘迫尤甚者其故有八各省餉需多者則撥款輕供億繁者則自用簡直隸有海防者也

而淮軍有專餉畿軍有專餉練兵有固本餉海防有北  
洋經費甘肅新疆雲南有邊防者也而西征滇防各有  
的餉江蘇財賦素饒海口較少四川協撥雖鉅邊事尙  
鬆福建現已劃出臺灣京餉亦少此外腹省雖有奉撥  
之款尙無新增之費廣東有廣潮廉瓊各口海防有欽  
州邊防有本省洋款有代還西征洋款有代還滇桂寶  
源洋款共一百一十一萬而本年部文嚴催解京滇餉  
款或增或補或提藩運兩庫至一百四十九萬內外兼  
籌接應不暇一也滇桂甘吉有邊無海江浙閩東有海  
無邊廣東兼之卽專以海防而論奉直東江浙閩之海

防地勢近內事機較緩廣東海防香港則鄰英越南則  
鄰法廣州口闊港多廉州濱臨大海遠不如閩口之險  
隘瓊郡狹小荒瘠更不如臺灣之富饒故無論外洋何  
國有事粵洋皆爲首衝前敵勢尤急而費尤多善後籌  
邊屢頒明訓若將礮臺師船之防軍概從罷遣水陸戰  
守器具練習人才一切製造之工用不狃規模將來有  
事時始爲臨渴掘井之謀必致糜費而誤事故他省或  
可弭兵節用粵省正當征繕經營二也財賦不外丁稅  
鹽釐四端廣東土田沃饒而丁糧素輕不惟難望三江  
抑且遠遙北省釐金向止一起一驗至於坐釐或有或

無較之江浙湘鄂爲數已輕且潮州以富強而無釐瓊  
州以貧瘠而無釐省城以通商口岸而無行釐鹽務引  
地雖廣而廣屬蕃庶精華之地皆爲港澳私販充斥形  
格勢禁無從防維潮橋分局一枝久爲漳私所拒年年  
賠累無所底止至於沿海之地多爲魚鹽影射亦不便  
操之過蹙自輪船盛行太平關稅項已屬支流其餘各  
府雜稅爲數亦復有限三也凡屬海邦大利全在商舶  
鉅款全在關榷江蘇最稱富饒而兼有各海關撥解南  
洋海防經費製造局經費輪船經費福建之船政有閩  
海關撥款浙江之浙海北洋之三口撥款皆多此皆取

之本省關稅者也廣東粵海關常洋兩稅收數素旺而大宗皆係撥解京餉西餉東餉南北洋應用廣東本省歷年有部撥常稅旗綠各營兵餉七萬兩從未解足且尙遞欠三年始行補解有奏定洋藥稅項下歲撥海防經費二十四萬兩近年大率僅解七八萬間有解五十萬外者本省用款未獲多爲協助四也從前西征洋款各省各關分還卽近日福建洋款亦係江海浙海閩海各關分還廣東與福建同辦一事而本省自還且前督臣所借洋款奏准本省專款指還者今又改換要需亦令另行籌還甚至代滇桂臺越所借寶源匯豐洋款奏

淮各省分還者除部撥之外其餘亦均責之粵還五也  
各省勇營滇桂餉數較輕最多者三兩二錢或二兩四  
錢一兩八錢不等湘淮各軍餉數雖重各營多有蒂欠  
卽如淮軍平日止發九關十關足餉此外各省防餉或  
輕或欠大率必居其一廣東勇餉舊章平日卽按楚軍  
營制正勇三兩六錢什長護兵以次遞加出省征調日  
加二分正勇加至四兩二錢按月支發從無蒂欠相習  
已久驟難更變較之他省所費已多六也廣東自紅匪  
滋事以後曹沖客匪惠潮鬪匪高廉土匪稔山會匪接  
踵滋擾盜匪迄未止息同治五六年間羣盜縱橫民不

聊生於是東西北三江以及廣屬內河沿海皆有巡緝  
兵勇扒船隨時捕治稍得安戢目前盜風復熾正須大  
加獮艾此項兵勇船隻需費甚巨斷難裁省且皆係零  
星分駐必須土人素習河道能覓眼綫者爲之其於防  
海守隘練槍演礮之營勇絕不相涉此項用費出於制  
兵防勇之外實爲他省所無七也各省出入率皆不敷  
然按籍而計雖短一二百萬問所以支持補苴之道不  
過積久協餉與欠發勇餉兩端卽如粵省向撥西征之  
餉止解七八成他省協餉如滇桂黔塔或少至一成或  
全未撥解此中藉可騰展今戶部以歷年未解之西征

餘款二十萬改撥爲籌邊軍餉卽須實解京餉增多十  
萬尤難欠緩本省旗綠兵餉雖撥粵海關洋稅十萬難  
望撥解是無形之中已增多實銀三十萬八也綜此八  
難似皆非各省之所以有臣等才智淺拙心計粗疎如部  
臣所云運籌有術實臣等之所不逮悚愧憂灼寢饋難  
安伏思粵省爲洋務發端歷次首先被兵之區兼鄰英  
法葡三國所屬之境當中華洋面第一道門戶之地積  
累雖深而當日有不能不先其所急之勢餉項雖竭而  
此後不能不爲綢繆善後之謀水陸廣袤而綠營已經  
裁汰三成則制兵驟難再減河海紛歧盜賊出沒則巡

勇亦難議裁至畿邊各款皆關安攘大計凡爲臣子者  
誼當不待部撥自請分籌方爲盡職但使稍可周轉斷  
無瀆懇恩慈之理自去年以來臣等督飭司局各員極  
力整飭入款鈎稽裁汰日夜不遑凡釐務餉項查有弊  
端防務稍有浮糜歷經參劾追繳者文武凡十五員奏  
報有案其撤差驅逐者尙不在內剔弊懲貪甘爲怨府  
上有聖明之鑒照下有士庶之見聞無如核省雖鉅短  
欠仍多查上年九月臣等奏陳動款趕辦海防善後各  
事宜嗣准部咨令臣等自行陸續籌辦竊思所謂自行  
籌辦者不過就地籌款取資商民今日粵省情形誠非

別開財源萬難措挂無如事雜言嘵責多諒少加以綜  
核之才殊屬不多再謀開源實非易事夫一省財賦止  
有此數地偏事簡者則取之於節省若萬無可省者則  
取之於外籌今籌者停止撥者日增舊案新案本省他  
省之洋款俱重疊累集於粵無米之炊何從取辦在部  
臣總攬全局精核無遺斷無獨苛求於一粵之理自係  
因粵省萬難情形尙未深悉而籌邊則路路俱要派撥  
則省省俱難臣等亦不敢不代爲計及此次所奏困絀  
情形及籌擬辦法均係勉力籌維或暫圖騰挪或尙待  
糴掘其間絕無纖毫推諉之意合無仰懇天恩俯念粵

力已竭粵事方殷南洋首衝關繫全局敕下戶部通籌  
熟計俾粵省得以應付支持不致遷就貽誤海疆幸甚  
臣等幸甚

旨戶部速議具奏單三件併發欽此

請指定專款備還本省洋款摺光緒十二年五月  
二十二日

竊照前因光緒九十一等年海防緊急軍餉無出經  
前督臣張樹聲前撫臣裕寬奏借洋款銀二百萬兩作爲  
第一次第二次臣之洞臣文蔚兩次奏借洋款銀三百  
萬兩作爲第三次第四次共五百萬兩以供本省防餉  
現經善後局核計開單每年應還本息之數自七十餘

萬至八九十萬不等必應籌備專款臨時撥還方免失信遠邦有妨關票前准戶部光緒十一年八月初二日來咨詢及粵省藩運二庫籌還洋款究係動支何項銀兩行令咨覆等因查張樹聲等所借係奏明在粵東應解西征協餉及劃還甘省洋款按八成而計每年須解銀六十七萬二千餘兩自光緒十年起全數停解以還本省現借商款嗣准戶部議覆該省應解西征款項除劃還洋款仍舊批解外其餘實解協甘之款卽自光緒十年爲始作爲該省陸續歸還現借商款之需臣等所借係奏明由藩運兩庫籌還未經指出的款現經督飭

司道等詳加核計粵省洋藥各項釐費爲藩庫歲入之鉅款計釐金一項除經費外每年所入不過十一萬餘兩光緒五年海防經費無出始議另行捐抽海防經費經商人黃進源包辦每年認繳四十二萬元光緒七年續行捐抽膏釐經商人虞齊政包辦並包防費每年認繳九十萬元迨商辦虧折改歸官抽復經減成招徠商販於本年四月咨明戶部在案計正釐防費膏釐等項歷年所收除經費外約五六十萬兩不等上年收數最絀僅得四十七萬兩有奇現經設法招徠力除中飽派撥輪施多方緝私始據商人黃昌禮等包釐承餉自認

總在六十萬兩以外試辦三箇月後再行定數果使無意外變更虧折約略可敷此項分還洋款之大半再查光緒九年十一月戶部議覆前督臣張樹聲等奏借洋款已准將粵省應解西征款項除劃還洋款外其實解協甘之款作爲歸還該省借款迨十年十月復有西征軍餉改撥近畿防餉之咨單開廣東省應解西餉劃還洋款四十九萬餘兩塔餉三萬兩內除光緒七年所借四百萬兩洋款案內光緒十一年還銀二十四萬三千餘兩仍由該省歸還外尙應解銀二十七萬餘兩茲再指撥光緒十一年近畿防餉二十四萬兩尙餘銀三萬

六千餘兩免其報解等因查粵省原撥西征餉八十四萬兩遞年勉力籌解暨代還借用洋款不過解至七八成約銀五十餘萬至六十餘萬兩不等今除劃還甘省借款二十四萬餘兩餘尙不敷還前督撫臣原借洋款本息之數若再改撥近畿防餉此外借款更屬虛懸且光緒十一年粵還甘省借款及本省第一二三四次借款爲數九十三萬餘兩已浮於原解之實銀六十餘萬兩實屬無力再籌迭經臣等奏請改撥在案復准部咨廣東省光緒十年連閩原應協甘餉十成銀九十一萬兩除扣抵海防經費十九萬兩代還洋款四十萬兩外

其餘協甘銀二十二萬九千餘兩准留爲該省歸還借款光緒十一年三月部咨代還洋款兩案還清可以騰出餉力二十餘萬適值近畿辦防故有指撥近畿防餉之議等因咨照前來伏查此次部臣所指協甘十成之餘款二十二萬九千餘兩一款向來未經籌出解過矧值經費萬分支紬之時豈轉能驟將虛欠增爲實款且光緒十一年無閏之年十成協餉亦僅八十四萬兩並無餘存二十二萬餘兩之多卽令有此款逾額籌解而還張樹聲等原借第一二次洋款每年四十萬兩內外不敷已多合臣等續借第三四次洋款每年應還八十

萬兩內外所短在五十七萬兩左右更何從設法支付  
惟洋款既在所必還部撥又未能稍緩臣等再四籌畫  
惟有請將每年實協西征餉數內劃留實銀二十萬兩  
張樹聲奏准原案雖係實銀六十餘萬兩今部撥要款  
甚多本省餉需尤鉅臣等未敢援案堅懇多留擬請於  
西征本款內指定每年撥銀二十萬兩作為抵還本省  
洋款本息之需其餘於洋藥各項釐餉內儘數湊還如  
有不敷另行設法籌補萬一稍有贏餘卽留爲籌還洋  
款較多年分彌補之用其鎊價或有增加之處亦當由  
此款內籌補查洋藥正釐每年止十一萬餘兩係聽候

部撥之款其餘另行捐抽防費膏釐等項從前皆係充  
支本省海防暨外銷之款合計西征藥釐兩項共僅留  
銀三十一萬餘兩其餘尙短銀五十萬兩不得已併  
將本省防費暨外銷之款添入此本非支撥京協餉之  
款且尙須設法整頓方可免敷此數特如此辦法不過  
先其所急力任其難而洋款雖屬有著防費更將無措  
尙須設法另籌據署廣東布政使蕭韶會同海防善後  
局司道具詳前來合無仰懇格外天恩俯念粵防歷年  
最久粵借洋款係四次借到三年分用合計不爲甚多  
俯准查照部准原案於西征協餉實數併准指定洋藥

釐餉等項內湊足撥還懇請飭下戶部勿於西征項下  
另撥他餉以紓粵急無任悚切屏營之至  
旨戶部議奏單併發欽此

籌捐巡緝經費摺

光緒十二年五月二十二日

據署廣東布政使蕭韶按察使于蔭霖會同善後局司  
道詳稱竊查粵省盜風最熾州縣捕役力有不及額設  
營汛不敷分布省外各路向來招募巡勇添撥練兵配  
駕拖扒等船分布省河及東西北三江西海江浦香新  
洋面等處水陸緝捕計兵勇數千名各路商旅藉獲無  
虞此項薪糧船隻軍火器械每年需銀三十餘萬兩而

購綫懸賞各費不與焉此款不在防餉之內現值庫儲奇絀用款浩繁而牙捐沙捐及省捐海防經費又已一律停止此項巡緝薪糧各費實屬無從撥發各路湘淮粵軍防營已四次續加裁撤屢經臣等檄行節省用款無如盜匪日橫巨案日多商賈居民均受擾害迭經將疏防文武嚴參勒緝若將巡緝兵勇船隻概行裁撤地方將不可問惟是此等常年鉅款各庫無可搜羅現經督同廣州府南番兩縣並會商省標四營將領邀集地方紳士公同酌議惟有就地籌辦以商人集腋之資還爲商民自衛之用查省城爲各貨總匯之區並未設立

釐卡同治八年經前督撫臣奏明在省城佛山江門陳  
村繁盛處所補抽百貨坐釐由商承辦較之行釐數目  
輕減一半兼係補抽其所未及並非重疊徵收故歷年  
相安卽承辦商人亦復從容餘裕且以行釐坐釐一併  
核算方諸江浙等省之兩起兩驗及湖南江西等省釐  
則爲數已覺輕微光緒十年該署藩司蕭韶在廣州府  
任時曾隨同前升任藩司剛毅邀集愛育堂紳董勸辦  
海防經費無不報効情殷此卽釐金無多行戶不甚爲  
難之明證也設使巡緝無具劫掠公行商賈豈能懋遷  
閭閻何從安謐現惟有勸令各行量力捐助經費專爲

水陸巡緝保護商民之用查愛育堂卽爲省城各行商  
賈薈萃公所向來專作有益地方公舉善事本省外省  
商人等素所信服今議由各行商捐資緝盜該紳董誼  
關桑梓自屬義不容辭舍此之外委係無從設法擬卽  
在於省城設立公所遴派端謹廉潔與情素孚之員督  
同紳董籌辦巡緝經費酌量商務情形以銷路之旺淡  
定銀數之等差務期眾情樂從毫無勉強責成愛育堂  
各行自行稽查隨時消息不令稍有滋累似此民捐民  
用於各行並無苦累而地方可期乂安至上兩年防務  
緊急分派委員前赴各州縣勸諭紳富捐助防餉經牌

所收捐數先後彙報請獎在案其中已捐未繳之款綜計尚不下十萬餘兩已繳各捐戶心頗非之竊謂此項本屬自行認寫之款並無強派抑勒若不一律收齊則先繳者已充防費後者得免解囊似不足以示公允以後地方公舉必皆觀望遷延實於激勸之道多有窒礙現在粵庫窘迫更甚於前除未捐者勿庸再勸外此項已捐未繳之十萬餘兩應仍催令繳齊以濟急需並照章補請獎敘等情詳請具奏前來臣等伏查粵省盜匪方滋斷無將巡緝兵勇船隻概行裁撤之理而庫帑艱難正議撙節又實有不能支付此等巨款之勢至地方

公捐經費衛良緝盜各省多有卽如廣東香山順德之  
護沙軍費專爲保護沙田設船募勇以備巡緝歷係民  
捐民辦官不與聞茲則保護商民事關全局眾議均屬  
僉同但非官督紳勸無以集事既以議定資以衛民他  
項不得挪用卽與民捐民用無殊該司道等所稱巡緝  
經費萬不可省而舍此又無從設法委係實在情形體  
察輿情似無不便至已捐未繳之款似應一律收齊方  
足以昭平允再此事係采集眾議實無窒礙如蒙俞允  
仰懇迅賜訓示遵行俾得及早勸辦庶於庫款稍資撙

節合併聲明

旨著照所請該部知道欽此

試造淺水輪船工竣摺

光緒十二年五月二十七日

竊臣等前因粵省現無水師兵輪六門海口內外扼守無具當於閩姓捐款內提洋銀二十萬元交署水師提督臣方耀等督飭員弁就省河黃埔設廠選募華工采取香港華洋船廠圖式試造淺水兵輪四艘以之防護海口援應礮臺於光緒十一年五月具奏奉旨據奏試造淺水輪船現已先造四艘著俟造成後詳加察看如果合用再行奏明辦理該衙門知道欽此茲查該輪船四艘於上年冬間陸續造成試水名之曰廣元廣亨廣

利廣貞入春以來安配礮械選派弁勇工役練習駕駛漸次嫻熟經臣等於五月二十三日親往閱驗操演船身計長英尺一百一十尺船面闊英尺一十八尺船深英尺八尺半喫水英尺七尺半合中尺六尺一寸有奇工料多自港來故皆以英尺估計廣元廣貞兩輪馬力七十八匹速率每四刻行英里十里合華里三十三里廣亨廣利兩輪馬力六十五匹速率每四刻行英里九里合華里三十里船面頗低以便攻戰輪聲甚小以免驚敵船後皆雙車暗螺內用康邦卧機內兩船兼用冷水氣櫃前後皆活桅兩枝龍骨左右帶以鐵脣水淺上

下輔以鋼板船頭安四頓半後瞠鋼礮一尊船尾安九  
生口徑克虜伯鋼礮一尊桅盤船腰各配一諾登飛連  
珠礮共三尊護礮皆有鋼板礮房與前奏所擬式樣相  
符當卽駛赴虎門內之蓮花山海面樹立礮靶該四輪  
連環操演察看礮力與船力相稱礮準約得什之五六  
船身轉捩頗靈行駛亦速機器一切磨擦光潔雖係華  
工所造視洋造者尙堪彷彿計該四輪本船工料修建  
船廠工料委員司事人等薪工載運起落各項物料夫  
價廠局什物繪圖暨雜項統共用銀一十二萬五千一  
百餘兩槍礮各件係就臺局現存者酌量配用價值不

在此內另購存鐵木各料銀一萬七千五百餘兩除原撥闡姓捐款二十萬元合洋銀一十四萬兩外尙墊支銀二千六百餘兩准方耀咨據監造赤溪協副將吳迪文等造冊具報飭營務處司道點收具詳請奏前來臣等伏查粵廠試造淺水兵輪事屬創辦工匠募之華人機器造之本廠款項由勉強羅掘而來法式由集思考索而定以視津滬閩廠局面恢閩工用精博遠不相侔今一年之內成船四艘總計船值礮械大約每艘不過五萬金遠而瓊山淺洋近而省河西海均堪行駛船頭之礮可擊水路八里中靶五里以之防護內河暨近海

各口頗爲合用現經選派員弁管帶分駐六門內外會  
合所在師船一體巡緝內河外海盜匪比較各輪船丈  
尺馬力照支薪費章程每船月支薪工加餉公費等項  
銀六百八十二兩零以符成案應俟籌有款項再行添  
造多隻以固粵防

旨該衙門知道欽此

勦辦九頭山洋匪摺

光緒十二年六月二十日

竊照粵省北海與越南連界洋面有九頭山孤懸海中  
距欽州屬東興司海口西南約百里越南新安州海口  
東南百餘里爲瓊廉兩郡商漁船隻必經之路該山四

島錯峙周圍六十餘里物產瘠苦所居並無越民指係中國沿海無業及犯案逋逃之人該山因舟師不入巡查積年窩聚盜匪或駕艇攔劫過往商旅或剽掠沿海村鎮居民久爲邊海大患同治十二年十月間前督臣瑞麟奏派副將雷秉剛等統帶兵船前赴九頭山亞婆萬一帶勦捕斬獲多名奏奉諭旨將出洋勦匪各員弁分別獎勵嗣後連年皆有九頭山洋盜出劫之案屢經瓊廉一帶文武各員隨時在海面緝拏救出被擄商民稟報有案終以兵力尙單未能常往該山搜捕光緒十一年六月間據瓊州鎮道府稟報派員督率師船在咸

恩縣漁鱒洲洋面擒拏盜首阮先等訊明係由溺斃之匪首劉亞鳳等在九頭山集夥出劫經臣等批飭按擬懲辦奏明在案上年秋冬間疊據廉欽等處商民呈控海盜劫掠之案甚多皆供係九頭山一夥分股四出以李廣興爲首吳大壯五次之其勢日橫經督辦欽廉防務前廣西提督臣馮子材函商以九頭山窩聚洋盜陸盜日聚日眾若不從此入手則北海盜匪皆以我師鞭長莫及負嵎擾邊後患未已當於上年十二月奏明由馮子材酌撥營勇水陸相機勦捕各在案先是署龍門協副將梁正源於九月初十日督船巡至潤洲東邁遇

盜船四隻該副將飭中軍都司梁鼎勳署右營守備邱志貴督兵開礮該匪還礮拒敵弁兵猛擊焚燬匪船一隻奪回民船一隻救出被擄水手何亞美等六名時值北風大作不能窮追各匪紛紛鳴水逃逸查點勇目曾永和中礮斃命兵勇龐文標等受傷十名分別撫卹醫治十月二十三日巡至三娘灣外洋見大匪船一隻追擊商船督率師船連放槍礮首尾夾擊約三時之久各匪拋棄槍礮意圖涉淺竄逃當駕舢舨追趕生擒盜首吳鳳春卽吳青洪潮和盜匪張定珍褐許陳吳四褐延錢王二廖觀養駱維堂等九名擊斃十餘名奪獲盜船

一隻大礮一尊小礮二尊旋經臣咨會馮子材派隊配  
船出洋添派陽江鎮總兵黃廷彪督同該副將梁正源  
率領輪拖各船隨同勦捕准馮子材先後咨報於十一  
月二十二二二十八等日經署欽州營參將楊瑞山  
督弁楊岑英黃彪在白龍尾洋面分投截擊擒獲盜匪  
陳計然鄭七蘇原等三名梁正源率帶輪拖哨見白龍  
尾洋面匪船五隻連檣而來梁正源激勵弁勇破浪而  
入該匪膽敢開礮與弁勇接仗兇悍非常自巳至未三  
時之久擊沈匪船一隻燒燬二隻各匪紛紛落海淹斃  
餘仍駕船且戰且逃各弁勇奮不顧身躍過賊船擒獲

盜匪徐亞保黃大鄭光喜黃得香張亞黑黃亞四陳廣  
複龐亞二伍文珍鍾廣生伍亞二陳老快鍾亞二林亞  
保陳炳通等十五名內龐亞二陳炳通傷重立斃起出  
被擄商民林書檢等四名奪獲匪船二隻大礮二尊洋  
槍四枝尚有匪船三隻忽先忽後意在連幫拒敵迨見  
官兵追殺卽駕船飛遁弁勇鼓勇急追直至青梅頭洋  
面該匪還礮拚抗自寅至午鏖鬪五時之久經弁勇施  
放火礮連燒匪艇二隻該匪始鳬淺水逃竄當燒斃十  
數名溺斃甚多格斃七名割取首級七顆追獲匪艇一  
隻擒獲盜匪鄧三黃亞石藍亞二溫石保李發勝米五

王晚七名奪獲大礮三尊洋槍二枝知府馮相榮遂督  
率萃軍會商黃廷彪梁正源遠出大洋合籌追勦督飭  
管帶輪拖各船之知縣李家焯都司劉華青守備黎炳  
泰黃廷琛府經歷石佩瓊參將符堅高守備陳才業千  
總黃輔成等於十二年正月初六初七初九等日齊抵  
九頭山亞漁溝洋面與匪船相遇擒獲盜匪謝大鼻二  
一名餘匪敗遁上山各軍水陸分進派定輪拖由通籠  
港大港口等處進攻並分布各船繞至北港巡截前軍  
由沙白環一路直搗山上賊巢於山險箐密之地該匪  
樹柵負拒一見官軍先行開槍黃廷彪馮相榮等督軍

四面進攻該匪抵死抗拒我軍與該匪互施槍礮攻戰兩時之久砍柵而入登時平燬巢柵斃匪多名我軍受傷十餘名生擒梁亞簡鄧三九吳亞晚吳亞三劉亞大黃亞烏黃進酉黃助球等八名起出被擄商民麥朝對等十五名搜獲槍械甚多其釋械聽命者免死其藏匿抗拒者分投追勦查該山地分四環當將賞格勸諭四環里長將匪交出並引導官兵搜拏以別良莠據里長符國章等報稱山上竄出之盜潛逃駕艇出洋當被後軍揮船截住轟沉斃匪甚多各軍會合兜勦當將匪首李廣興李廣彥麥生吳大肚五譚初五名一併擒獲並

擒獲著匪鍾四吳二郭六顧三關二鄧貞斤黃亞三馮東養黃寶青鄭煥南陳亞二張亞發馬亞英等十三名共十八名內麥生因傷旋斃奪獲匪船一隻鐵礮洋槍火藥軍械多件業經電奏在案嗣經官軍入山搜捕又獲盜匪陳亞晚曾得有趙亞和李良陳士彬竇亞隆竇亞九黃六張五褚福求陳亞花四翁四鍾大林永芳駱亞五等十五名查係賊寮均行焚燬其被脅可原者俱經李家焯訊明分別保釋其先時聞風竄出之匪責成該里長具結限拏餘眾查無抗拒情形眼綫指證者嚴諭里長約束安業各軍遂卽駛回欽州當經馮子材將

所獲各匪發交署欽州知州余鑑海審訊明確將積年  
劫殺抗官之著名匪首李廣興吳大肚五李廣彥譚初  
夥匪鍾四吳二郭六黃晚顧三關二鄧貞斤黃亞三馮  
東養黃實青陳計然鄭七蘇原陳亞花四翁四鍾大梁  
亞簡張五徐亞保陳老快黃大二十五名正法梟示其  
餘質審明確分別辦理計陣亡勇目一名弁勇受傷二  
十餘名重加卹賞醫藥察看九頭山情形經此次大加  
懲創水陸附近匪盜失其所恃當可稍爲歛戢等因咨  
報前來臣等伏查九頭山橫亘北海界連華越藏納盜  
匪伺便出沒歷有年所廉環沿海居民華洋往來商旅

均受其害以致近來北海內外洋面劫案日多現值越南舉辦界務之際廉瓊水陸防務均形喫重若不亟趁此勘界未定時早爲清釐則將來必致招納內奸勾串越匪影射鄰邦常爲邊患現經斬獲著匪多名巢穴既覆洋面當可漸就肅清實於戢匪防邊不無裨益其此次出洋勦捕盜匪出力之員弁兵勇等合無仰懇天恩俯念遠出大洋擒渠掃穴不無微勞可否查照同治十二年成案准由臣等擇尤分別奏請獎卹以勵將士而靖海疆出自逾格鴻慈除咨照馮子材併嚴飭該鎮將督率兵勇仍於洋面認真巡緝隨時截拏外所有派軍

勦辦九頭山亞婆溝洋匪擒斬首夥攻燬賊巢安輯島民各緣由臣等會同督辦欽廉防務前廣西提督臣馮子材水師提督臣方耀謹合詞具奏伏祈聖鑒

旨著准其擇尤保獎毋許冒濫欽此

力疾銷假並謝兼署撫篆摺

光緒十二年六月二十二日

竊臣前因病體未痊奏懇續假一月於五月十三日差弁齎回原摺後聞軍機大臣奉旨著賞假一月欽此荷恩慈之矜恤彌銜感於私衷遵卽趕緊醫調仍一面照常治事一月以來體氣雖仍如常肝鬲漸覺清爽適於六月十四日准吏部咨光緒十二年四月二十七日奉

上諭倪文蔚著來京陞見廣東巡撫著張之洞兼署欽此二十一日准撫臣倪文蔚將廣東巡撫並太平橋監督各關防王命旗牌文卷委員齎送前來並循例將辦理廣東學政關防并一應卷宗移送到臣當卽恭設香案望闕叩頭謝恩祇領任事伏念臣兼圻謬領兩載於茲庸材辱軀正求罷退乃荷聖慈優容迭予假期復兼職任鴻施逾格感悚難名當此疆事緊要責無旁貸之時臣惟有力疾暫行銷假將兩衙門公事分別籌維一  
律整飭本任固係職守攸關署任亦不敢稍涉忽略勉策駕庸惟力是視以冀仰答高厚鴻慈於萬一

旨知道了欽此

請頒沙田部照摺

光緒十二年七月初一日

竊臣前欽奉上諭沙田升科一事正賦攸關豈容奸民  
蔽匿迭經戶部奏催辦理著該督撫督飭所屬查明已  
升科若干畝未升科若干畝卽將未經升科之沙田迅  
卽確查妥辦具奏等因欽此當卽恭錄欽遵督飭司局  
籌議辦理近准戶部咨現擬改辦升科誠爲正本清源  
之計粵省地居濱海沙坦較寬此項退水之田素稱膏  
沃獲利旣厚流弊滋多是在妥議章程豫定期限嚴稽  
匿稅慎選賢員一切事宜果能經理認眞自必立覘成

效況仿照山西豐甯馬廠成案辦理更當確有把握萬不至若從前之因難中止務須妥速籌辦勿涉因循等局司道詳稱粵省沙田以廣州府屬香山爲最多順德新會東莞次之番禺南海又次之潮州府屬海陽揭陽潮陽澄海等縣爲數有限自嘉慶二十三年查辦升科以後所有新沙溢坦斥鹵成熟雖迭經報查清丈飭令照則升科終以未經部覆核定未能入額編徵各業戶坐擁膏腴仍完斥鹵輕則至沙田畝數湖查嘉慶三十年奏案已查明奏准升科者五千三百餘頃此項名

爲老沙咸豐三年屯田變價案內除由官屯虛稅無人承領五百餘頃外實定則升糧者一千四百餘頃同治六七年清丈案內查出溢坦繳息升科者五百餘頃光緒七年補升案內查出斥鹵成熟應按則補升者四千餘頃此各項皆爲新沙此外近來新增溢坦自當不少但未經呈報勘丈無從據擬合計老沙新沙有案可稽者共計一萬一千三百餘頃至同治年間清丈案內奏報沙坦一萬九千餘頃查與司案縣案皆不相符似係舛誤無關收息銀數出入應俟查明致誤之由另行辦理惟查老沙新沙皆未請給部照民間但憑墾單縣

照司照管業其間或有遺失或經典售影射侵佔敢爭受累均所不免此次擬請除原額民田外無論老沙新沙一律換給部照其每戶田不及一頃者以一戶爲一照其一戶田過一頃者以一頃爲一照如數頃數十頃之外尙有尾零數十畝亦儘數填給一照以便買賣分析老沙無庸再丈按冊核給新沙清丈明確立時填給嗣後民間買賣過割以此爲憑仍詳加查勘分別上則中則升科起徵永遠免其攤派捐抽此次繳息定則俱較舊章酌量從寬庶國課漸充民情亦順現已詳察輿情酌擬章程一面遴員設局延商公正大紳出示開辦

惟必須頒發戶部空白執照隨時填給方期鼓舞其照  
式由粵省酌擬各部核定刊發詳請具奏前來臣查廣  
東查辦沙田之案自道光二十四年以來已不下五六  
次或溢坦歸屯或屯田變價或斥鹵補升或呈報溢坦  
或海防沙捐查勘累年籌捐多次惟始終未領部照未  
編賦額以故清如不清丈如不丈不能取信於民由來  
已久此次遵旨清丈升科應頒部照隨丈隨給使各沙  
戶曉然於此舉實爲便民安業一勞永逸之計執有此  
紙以後或買賣或管業永息訟爭更無派累庶可踴躍  
趨事一律澄清查臣前在山西巡撫任內勘辦豐甯官

荒馬廠卽係奏准頒發空白部照隨丈隨給一時租戶  
耕氓無不爭先引勘惟恐清丈委員到來之晚事理相  
同民情可見竊聞直隸奉天等處丈勘荒地辦法略同  
此次部咨旣准彷照山西豐甯馬廠成案催令速辦相  
應援案奏請現卽委員赴部領解此項部照回粵以期  
妥速合無仰懇天恩飭部迅速頒發空白沙田執照一  
萬張交委員領回俾得及早勘辦一俟辦有成數隨時  
咨報實於清賦便民大有裨益

旨著照所請戶部知道欽此

請派大員澈辦瓊州客黎各匪摺光緒十二年八月初十日

竊惟瓊州一府孤峙海南黎巢其中民環其外地瘴而  
瘠民弱而惰其爲地方之害者一曰客匪一曰黎匪客  
匪大率皆籍隸嘉應州及廣州府屬之新甯肇慶府屬  
之恩平開平高明鶴山等縣言語風俗自爲一種土人  
不與爲昏姻或云卽係犷人非若他省僑寓民戶皆謂  
之客民也其性勤苦力作悍猛齊心所到之處土民無  
不視爲他族積爲深讐在瓊有老客新客之分老客寄  
居百餘年較爲安分新客則多係同治年間恩平開平  
高明鶴山新甯陽江等處滋事客匪前撫臣蔣益澧奏  
明安插高廉雷瓊等府廣西容賀等縣瓊屬之儋州臨

高澄邁皆有之漸衍及萬州陵水等處查瓊屬沿海民居之地患在沙瘠近山膏腴之區患在瘴癘至銅鉛各鑛皆在黎境土民安於貧弱地利坐荒瘴地腴田多屬客產光緒五年客匪滋事經前督撫臣派軍前往分別懲辦遷之雷廉乃未久而潛回故里爲匪如故以後土客之避遂成黎人所居最深處曰黎母山其地居瓊之中盤亘數百里現在未經開通之處縱橫二百餘里十三州縣環之定安會同樂會萬州陵水崖州等處皆有峒口出入前代生黎獠狉荒陋爲患尚輕百年以來熟黎與民人往來習爲狡黠生黎漸稀出巢益數諸黎以

儋州臨高爲最馴陵水之傍黎歧黎爲最悍崖黎富強亦易滋事其出也北路則定安當其衝而波及於瓊山南路則萬州陵水當其衝而旁擾於會同樂會從前出掠不過附近內山而已近七八年來客匪游勇散入其中奉惠州客民陳鍾明陳鍾青爲總頭目合生黎熟黎客匪游勇爲一夥名爲黎而不盡眞黎遂敢離巢數百里大肆劫殺其軍火鹽米皆由客民接濟每牛一頭易槍一枝火器旣具黨羽益多得以抗拒官軍習爲戰鬥歲必出巢兩三次該處官軍未嘗認眞痛剿一次不過零星分防尾截零匪幸其回巢以爲了事大率客匪以

黎峒爲負嵎藉黎人爲聲勢黎匪以客匪爲嚮導藉游勇爲附從客黎糾結全瓊遂無安枕之日此二十年來客黎各匪蓄毒構畔勾結滋蔓之實在情形也其僭臨客匪一股自光緒五年查辦遷徙以後當時設局籌費給予圖記使客籍紳士自加約束而局紳楊元珍陳贊桂阮祖祿等庇匪仇民匪徒益無所畏忌迨上年冬間澄邁紳圍入臨高搜捕復爲該局紳阻回時值歲旱米貴人心搖動匪首黃鄒保等結新老各客於十一月揭竿遽起到處裏脅雜匪游勇乘機附和旬日之內眾至二千餘人以臨高之和舍蘭洋岑崙南豐儋州之抱舍

田表樂基那大四方山大星等市爲老巢擾至澄邁之  
金江司瑞溪等處金江爲澄屬大鎮市該處旣破賊勢  
蔓延臨澄百餘里間所到村莊恣意焚殺勒索資財民  
間積聚一空而陵萬黎匪復有出掠會樂之信合郡驚  
擾臣聞報後卽電飭署瓊州鎮總兵劉成元護雷瓊道  
瓊州府知府謙貴調集駐瓊各軍以兩營防黎以三營  
勦客黎匪旋退合軍進剿西路參將陳榮輝率粵軍提  
督張拔萃率楚軍迭據鎮道稟報節次擊賊獲勝收復  
金江楓樹市西峯下嶺等村官軍進剿那大和舍擒斬  
匪首劉貞贊陸真佑林鴻猷龐六石等暨餘匪多名匪

首黃鄒保溫河清率黨赴陳榮輝營投誠溫河清並斬  
其黨范亞先江二來獻請照光緒五年安插儉臨客匪  
成案將此股投誠丁口移徙欽州之白龍尾墾荒自給  
等情前來臣查該鎮道迭稟以該匪屢經官軍戰勝畏  
勦投誠自願交凶就徙始定撫議乃經臣訪聞官軍並  
未痛勦民恨客匪痛入骨髓咸以此策爲非且白龍尾  
在欽州西南海濱正與越境毗連豈有將無數匪徒置  
之界上自貽邊患之理當經駁飭再議遂至枝梧無策  
其時眾論參差民情惶惑竊思督辦欽廉防務提督馮  
子材威望素優欽廉僅隔一海情形易悉往復詢商該

提督謂客匪不可信未勦而撫亦非長策適瓊民亦紛紛  
赴欽呈訴懇馮子材發兵往勦當經電奏請旨飭派馮  
子材親赴瓊州察看情形孰宜撫孰宜誅以定辦法兼  
籌黎事六月十三日奉旨此項餘匪業經就撫義無盡  
誅著馮子材赴瓊妥籌安插仍隨時妥商張之洞詳慎  
辦理勿得稍有輕忽欽此遵卽恭錄咨催馮子材於七  
月初旬抵瓊而黎警又作自本年春間黎匪出擾瓊山  
之屯昌市七月間逆首陳鍾明部下黎客雜匪千餘擾  
定安之南閭仙溝雷鳴各市及澄邁之新吳市同時另  
有儋州匪徒陳鍾銘糾眾滋事攻掠感恩縣西鄉黎漢

各村至陳榮輝所撫客匪飭令造冊送點遷延避匿其  
頭目多自營逃歸撫局竟未就緒臣迭次派員赴瓊密  
查接閱該處探報並由馮子材暨道員方長華封送紳  
民公牘數十起備知該客匪異常兇悍文詞悖逆士民  
連年受害甚酷卽如去冬出擾澄邁所屬焚掠至百餘  
村戕害良民至七八百人擄掠婦女至百餘口劫去耕  
牛至二千餘隻財物至值錢百餘萬串迨官軍進剿雖  
有斬擒而巨憝未殲大股仍在勉爲就撫首鼠兩端其  
用心叵測黎匪今秋出擾距安定縣城止三十里焚殺  
亦甚凶慘回巢時告虜脅運送財物之民人云俟下次

出巢再併給扛擡價值尤爲狂悖自馮子材到瓊後羣情欣悅籲懇爲民除害臣綜核情形客匪黎匪皆宜勦撫兼施若再不亟圖良策大拯瓊民糜餉分防永無底止受害愈深失業愈眾養癰長寇合勢燎原數年以後必致瓊地全爲羣匪糜爛而後已查前署雷瓊道王之春遵旨隨同勘界所部久無主將漸就懈弛先於六月間檄委在東差委之廣西候補道方長華赴瓊籌辦客黎各匪卽接統其眾將原有春字毅字各營重加整頓汰弱留強編爲八底營統名瓊軍仍飭聽馮子材節制近日疊與馮子材電商定議客則臨以兵威分別良莠

誅其凶悍爲亂抗拒不悛者撫其安分謀生真心悔罪者或卽用爲官兵前驅攻黎自贖或遷往他處相宜地方應俟臨時察看情形由馮子材督飭方長華暨瓊屬地方官妥爲辦理黎則先勦積年逆首陳鍾明一股先將附和擾害之外匪亂黎痛加懲創以次招徠貢黎宣布朝廷德意相機進兵如其勢順情通再議深入老山馴生闢土之策伏查本年正月二十二日寄諭瓊州黎人迭次滋事重煩兵力果能設法化導變狉獉爲馴擾實當務之急等因欽此仰見聖謨廣運灼見孤島籌防必先自清內患始儻能從此長驅深入仿照前明以來

海瑞諸人開通黎峒十字路之議據其腹心通其險阻令其雜髮嚮化設立土目從此漸開鑛利廣植禾蔗增益賦稅利民通商於海防實大有益即使地終不能富民終不能強而瓊地永除心腹之患瓊民永免塗炭之苦亦地方官必不容已之責當務爲急誠如聖諭此臣所以熟籌深念不能不爲大舉澈辦之計者也惟地勢廣闊山箐深邃今擬客黎兼辦數路並進兵力過單無濟於事馮子材所部萃軍除留欽防外帶赴瓊者四底營茲酌派十四底營益以瓊軍八底營陳榮輝全字兩底營調往協勦之王孝祺勤軍一底營當可勉敷分布

惟飭源奇窘祇有飭司局設法挪湊移緩就急暫爲應付并咨商馮子材勸諭紳民曉以大舉安民之意就地籌集經費以助軍需至該前署鎮劉成元兼護道謙貴於該處賊鋒恣肆生靈荼毒官軍未能得力並未詳切稟聞籌畫妥實辦法但以賊匪敗退就撫爲詞敷衍了事實屬玩忽因循昧於事機自應予以懲儆除接署瓊州鎮張得祿在任日淺業經病故應予免議外相應請旨將前署瓊州鎮總兵記名提督劉成元交部議處兼護雷瓊道瓊州府知府謙貴革職留任前署海口營參將南澳鎮右營遊擊陳榮輝輕於撫匪草率敷衍且所

報戰狀不免鋪張尤爲軍營積習亦應懲儆姑念該參將深入瘴地尙有斬獲擬請將陳榮輝革職留任責令將所撫各匪刻日造冊送交馮子材辦理以竟前局如始終不能切實出力卽行從嚴參辦馮子材現督辦欽廉防務應請明降諭旨令該提督兼督辦瓊州客黎事宜其鎮道以下官暨瓊防各營兵勇悉歸節制以一事權

旨此項客黎各匪必應分別貞莠勦撫兼施著馮子材督率各營相機辦理以靖地方其稟報不實之提督劉成元著交部議處知府謙貴遊擊陳榮輝均著革職留

任該部知道欽此

張文襄公全集卷十七終

紹興孫家棟校

張文襄公全集卷十八

奏議十八

大修廣肇兩屬圍堤工竣摺

光緒十二年九月初三日

竊照上年水災緊急之際賑饑堵決多方拯濟自八月後災象稍舒臣與前撫臣倪文蔚及司道等籌議僉謂備災之計與其補救於事後不如豫防於未然因擬籌集鉅款大修沖要圍堤曾於上年十月初九日將大略情形奏明在案查廣肇兩府水害考諸省志從前每數年十數年而一見近二十年來幾於無歲無之其患常在西江若助以北江則爲害愈烈上年通省潰決圍堤

一百五十餘而高要高明四會清遠三水南海六縣所屬一百二十九高要高明受西江之水四會受綏江及西江之水清遠受北江之水三水南海兼受西北兩江之水故此六縣爲最沖餘縣或地勢較高或受水較緩或去海已近旁溢倒灌爲患稍輕當九月間派員攜帶算生勘繪圖式籌計辦法於此六縣中擇其圍大田多當冲受灌者若干處分別首冲次冲又次冲酌加培築分爲三路南海圍多事繁自爲一路責成前署督糧道蕭韶督同署南海縣張琮辦理嗣蕭韶委署藩司卽專令張琮經辦三水清遠河多溜急面面皆冲工程最爲

契重合爲一路責成署陸路提督鄭紹忠辦理高要高  
明四會地處上游合爲一路責成肇陽羅道潘駿猷辦  
理湘軍統領提督陶定昇籍隸岳州熟諳堤工檄調其  
部下弁勇赴肇慶幫同工作查圍基本屬民工然其時  
民困未蘇非由官先發鉅款以爲之倡不足以資鼓舞  
而司局各庫正當無款可籌且借修圍基仍須帶征歸  
還事亦膠葛查有誠信敬忠兩堂商人捐修會館銀三  
萬餘兩曾於上年九月間奏明發交紳董收儲改作修  
築圍堤之用又查辦肇慶府黃江稅廠書巡浮收累商  
案內該廠書巡等罰繳銀八萬五千元七兌合銀五萬

九千五百兩以助廣肇災區修圍之費本年三月奏明  
在案又光緒九年間直隸籌賑局司道以順直水災刊  
印捐資經前督臣張樹聲行司分發勸辦嗣據各屬陸  
續捐繳計收存銀四千三百兩零二錢二分因爲數無  
多其時順直賑務已竣尙未彙解又上海協賑公所紳  
士嚴作霖等解來助修東省圍工西省路工規平銀二  
萬七百三十三兩六錢九分四釐除撥解西省外尙存  
銀一萬五千二百四十七兩六錢七分又在上年試辦  
牙捐項下提銀十二萬兩又卒同各官捐集銀二萬六  
千五百二十一兩零四分四釐計共籌撥捐集銀二十

五萬五千五百六十八兩九錢三分四釐均充本案大修圍堤之用於上年十月興工本年四五兩月先後告竣查南海縣地居首要勢處下游現將該縣西北兩鄉較爲喫重之五十二圍一律加高培厚並於沖要處所加作內圍或添作石砌建造石閘就中以胥箕篤大攬背鳥茶塲花岡南沙荻洲頭三水南岸珊門大良官洲大珊下龍灣基羅格南北大富共十五圍基爲最要其支用銀一十萬零二千兩由該署縣張琮督率紳董修理核實支發至兼跨南海順德兩縣最大之下桑圍東西圍已於上年九月照案於籌備堤岸項下發銀一萬

兩交圍紳修築此係該圍生息專款並非正項業經於  
本年二月專案奏明計南海境內當沖較大之圍僅良  
鑿一圍因原修堅固未經發款加修三水縣爲西北兩  
江所匯注上年全縣三十三大圍概行漫決雖經修復  
此次必須加培完固其衝要各圍於頂溜跌塘處所必  
須間用石壩或用石築基或參用灰沙以期堅穩此次  
計培築大小四十八圍堤就中以縣前魁岡深水擔竿  
涌尾江根榕塞東海口壩石頭岡兩圍上梅埽下梅埽  
長洲青塘永豐大陵鳳起蜆殼白泥谿陵雄旗蜆塘竈  
岡二十四圍堤爲最要共支用銀六萬四千九百零七

兩一錢三分二釐清遠縣除石角圍外有基無圍上年  
漫決十七基隄被灾亦重此次計培築二十二基隄就  
中以下界牌上界牌恒頭花岡山塘金亭正江口倒水  
灣黃岡捕屬三壩十基隄爲最要共支用銀一萬五千  
零六十九兩五錢四分一釐以上三水清遠兩縣均由  
署陸路提督鄭紹忠督率地方官營汛兵勇紳董修理  
核實支發高要縣上承梧州三江下束於羚羊峽水勢  
易漲難消上年受災最先此次計培築二十四圍就中  
以景福羅秀豐樂大灣白石五圍爲最要內景福一圍  
近護府城羅秀一圍爲高明各圍門戶決口深廣屢築

屢潰尤須大加修築粵省民圍向止用人築牛踐今於  
高要最衝各圍或酌加夯硪或幫石護根或須打椿沈  
船或須運土填潭羅秀一圍尤極費手共支用銀四萬  
二千六百九十兩零六錢三分七釐高明縣圍基較少  
地方最瘠此次計培築十四圍就中以上秀麗下秀麗  
三洲下圍大沙下圍白鶴五圍爲最要共支用銀一萬  
一千九百六十八兩九錢五分四會縣當懷集廣甯高  
要下游每遇西江綏江並漲上注下灌交受其害上年  
漫決各圍均已修復此次計擇要培築十五圍就中以  
倉豐上倉豐下大興馬安四圍爲最要共支用銀一萬

三千九百七十四兩五錢以上肇慶屬三縣圍工係由肇陽羅道潘駿猷督率該府縣暨肇慶督標協營弁兵委員紳董修理核實支發又打椿機器租價測繪地圖薪工勘修委員夫馬等項共銀六千二百九十六兩五錢一分四釐通計六縣一百七十五圍隄加高培厚以及添造石工重築基址統共用官款銀二十五萬六千九百零七兩二錢七分四釐除以上籌撥捐集銀二十一萬五千五百六十八兩九錢三分四釐尚不敷銀一千三百三十八兩三錢四分在司庫海陽等縣塘租奏留充公項下撥銀一千三百三十八兩三錢四分充支

足數此次因有官款助修民情極爲踊躍用能妥速歲功現據各路陸續具報工竣除南海之大有巾子銀涌峴殼孝墩五圍興工較晚將次修竣續行勘收外其餘逐一委員驗收均屬堅實完固足以捍衛田廬其酌發官款之數各視當衝等差業戶貧富工程大小斟酌消息或官一民二或官民各半或官款多至什之七八亦間有因灾深民困全資官力者大抵南海各圍民籌多於官款肇屬高要高明四會三縣各圍官民約略相等三水清遠兩縣各圍官發多於民捐通盤率算略以官民各半爲率此外尙有愛育堂紳董自行捐資助修者

不在此內惟查廣東圍基向係民捐民辦其修築圍基  
力有不足者定例由官借給修費分年帶徵歸還僅南  
海桑園一圍其中村落田畝最多嘉慶二十二年前督  
臣阮元借支庫款銀八萬兩發商生息遞年歸本存息  
以備歲修道光十三年廣肇兩府大水前督臣盧坤等  
籌集官捐銀三萬五千餘兩紳富鋪租捐銀三十五萬  
餘兩均充賑濟至修圍之費仍奏明借給分限五年免  
息征還光緒四五等年清遠縣石角圍冲決該圍爲三  
水南海兩縣保障前督臣劉坤一等勸集民捐銀八萬  
餘兩修成石工此次水災適當海防倥偬重勞民力之

後而當冲各圍不能不急修以備春漲若勸捐恐涉遲緩借款亦多葛藤故擬籌集鉅款爲官民合辦之策以資感發而速成功計此次大修官籌銀數合之去年夏秋堵決代賑八萬九千餘兩之數統計已及三十四萬餘兩今年水勢雖覺稍緩而五月盛漲時較之上年高要僅差四尺九寸三水僅差二尺六寸南海僅差一尺三寸各圍幸獲安全惟南海之射洲肚窩琴沙巾子四圍高明之陳深水等一圍沖決或數丈或十餘丈皆係低窪小圍傷稼尙屬無多但使每年少決十餘圍卽爲民間保全錢穀百餘萬所動各款除會館捐款廠書罰

款本係奏明專備圍工之用外借用順直賑捐存款目  
前順直正有水災應由粵另行籌捐歸還漸紳捐款出  
於樂施善舉粵官捐款尤係分所應爲均不敢邀請獎  
敘塘租奏留充公一款本係各官應領之項令其節省  
輸助扣發辦公其牙捐一項因海防需餉甫經試辦並  
非向有庫款且防海修圍同一保衛民生之事今以取  
之於商者用之於農似於情理尙順各圍均經詳加查  
核委係實支實用此係官民合辦且並未動支正項錢  
糧應請免其造冊報銷仍飭各屬督令各圍總業戶人  
等各就該圍向章隨時妥爲保護自行培築日增月益

常保無虞其各圍修過丈尺銀數官款數目一面刊刻徵信錄宣示周知由廣東布政使高崇基會同善後局司道詳請具奏前來臣伏查此次大修廣肇兩屬沖要圍隄乃仰體慈恩浩蕩軫念邊黎故亟於懲前毖後之時勉爲曲突徙薪之計溯考粵省修圍成案關係重要者共三起前督臣阮元則借款提息專充桑園圍歲修意在先其所急惠而不虛盧坤則賑款捐放圍款征還意在分別常變俾救急之與循法並行不悖劉坤一則專作最沖大圍石工意在擇要併力成效較鉅三督臣辦法不同而用意精密實皆爲經久良規此次水患過

廣災民過崇防務粗定游匪日多必宜先保今年農收  
方免眉睫之患勢不能專顧一兩大圍從容籌修又以  
海防民困之餘專勸民捐必致畏難貽誤暫借帶征亦  
多觀望不前今昔時勢不同故不得不羅掘大舉官倡  
民和合力成之此後遇有修築圍基之事仍應按照定  
例借款征還或籌修最要一兩處方爲經久之法此次  
工程係屬官民合辦核實支發並未動用正款其滙紳  
集捐粵省官捐均係仰體聖慈救災盡職出於至誠不  
敢仰邀議敘相應將修築各圍隄加培丈尺石壩工段  
籌發款銀數分別清單並繪具西北兩江水道及此次

修築各圍隄圖恭呈御覽仰懇敕部查照免其造冊報銷至各官捐助銀數銜名已於賑撫堵決案內開單奏陳母庸重列

旨該部知道單片圖並發欽此

修築潮州府屬各堤工竣片

光緒十二年九月初三日

再上年七月潮州府屬韓江水漲沖決海陽饒平澄海三縣堤岸淹損田廬當經潮州道府籌捐銀三千兩及時賑撫臣復飭司籌撥銀五千兩委員前往勘辦工賑業經會同前撫臣奏明在案該處近海水消迅速田廬並未久淹尙無大礙惟三縣堤岸冲決甚廣經該屬紳

董在籍福建補用知府郭廷集等籌議集款興修估計  
海陽縣屬秋溪堯里等鄉堤基修費銀五萬餘兩饒平  
縣屬隆都等鄉堤基修費銀一萬五千餘兩澄海縣屬  
洪橋等鄉堤基修費銀七萬二千七百餘兩而海陽南  
堤自郡南之安南廟起至龍都長橋止計長八千一百  
餘丈保障三縣捍衛府城沖決計數十處若僅略事補  
苴終屬敷衍之計必須一律加高培厚庶可收一勞永  
逸之功估計全堤修費約需銀一十六萬餘兩此次紳  
民集議原擬自行籌捐前將發去官款銀五千兩分撥  
海陽澄海各二千兩饒平一千兩爲之倡率小民自衛

身家踴躍爭先已集資十一萬八千餘兩尙短銀四萬  
餘兩力難再籌競赴該道府呈懇發款助工因查上年  
海陽縣紳富海防捐輸已捐未繳之銀尙有一萬餘兩  
經該道府稟請將此項如數催收卽發作津補此項堤  
工之用其餘不敷之數再勸令殷戶量力題捐其澄海  
縣屬之洪橋鄉堤岸民間籌捐不敷亦擬將該縣紳富  
欠繳海防捐項二千六百餘兩催收撥用當經臣批飭  
照辦查署湖州鎮中軍遊擊方鰲情形熟悉素能聯絡  
紳董因飭該遊擊及該府縣分派委員督工趕辦統計  
三屬賑撫修築之費除民捐不計外上年由司所發之

款係在沙田海防捐項下撥銀五千兩茲催收紳富海  
防捐款撥給銀一萬二千六百餘兩共銀一萬七千六  
百餘兩均隨時發交各該屬紳耆領出兼同民捐自行  
經理支用其紳富捐款催繳不齊者應由民間自行籌  
捐足數現據該道府稟報饒平澄海各堤均已告成惟  
海陽南堤工程較鉅趁此秋晴併力趕築亦卽陸續竣  
工查潮郡素稱殷實該處堤工向係民捐民辦此次因  
上年水勢過猛沖決太多迫近郡城急須修築鞏固需  
費浩繁又適當廣肇兩府被災之時賜金籌款工賑兼  
施該屬紳民同時呼籲未便概從膜置致涉偏枯且所

動皆係捐款以資補助民堤尙屬相當應請併免造冊報銷

辨認欽州老界繪圖列證請旨飭辦摺

光緒十二年九月初七

日

竊臣欽奉光緒十一年七月二十日寄諭本日已降旨派周德潤前往雲南鄧承修前往廣西會同各該督撫辦理勘界事宜卽著岑毓英等各委明幹之員帶同熟悉輿地之人周厯邊境詳加履勘繪具圖說以備考證等因欽此又奉十月初二日寄諭目前分界自應以會典及通志所載圖說爲主仍須履勘地勢詳加斟酌周

德潤鄧承修親自履勘該處地形瞭然在目自可相機辦理岑毓英李秉衡就近面商務臻妥善張之洞張凱嵩身任地方如有所見亦當詳告以資商榷等因欽此本年四月間勘界大臣鄧承修自桂返廣商詢一切該大臣面稱疊奉電旨現在先辨認老界自當欽遵辦理查欽州接壤越南有三都八峒地方轄境甚廣自廣西上思州沿邊之十萬大山起厯分茅嶺跨二丈河而下南至舊址漫漶不可復識與桂之鎮南滇之馬白儼然設關戍守者不同是以中越地勢華離參錯民夷雜處有旣入越界後行數十里復得華界者有前後皆華界

中間斗入一綫名爲越界者有衙署里社尙存華名檔案可據者有錢糧賦稅輸繳本州列名學冊者有田宅廬墓全屬華人並無越民者固由越爲屬藩不甚考究亦以邊地荒遠地方官未能撫馭周密之故今越歸法護界務一定邊防因之欽州距廉瓊甚近若水陸形勢險要盡爲他族幅處則他年貽患悔不可追且華民數萬戶廬墓數百年紳民老幼泣訴環求亦斷不能置之度外近譯法人所繪越南地圖其指爲新界之處竟將欽州西南一帶劃入越境若我於老界再不切實辨認必至內地轉爲侵佔此臣所以悚惶憂慮而不能已者

也臣自上年八月卽委通判劉保林等與督辦欽廉防務提督馮子材所派都司陶烈武等就近密勘沿邊形勢疊據五峒紳耆公稟額懇復參稽志乘調查檔案並據該府州縷稟各節所言皆符當於上年十二月會同前撫臣倪文蔚奏請電飭勘界大臣鄧承修與法使勘辦辨論並將草圖按據呈稟各件咨送在案嗣經添派知府尹恭保帶同繪圖人員前赴該峒邊界重加履勘徧考舊聞續查案據復飭隨同勘界督糧道王之春覆加研核益得其詳大抵該處中國老界確鑿可據之證共有十端皆係原本本朝史館官書部案公牘刊本省

府縣志知州學官冊檔印契越南國王印文峒長世傳  
有印分單正與前奉諭旨以會典通志爲主之意相符  
實應全行辨明認還方昭公允與演桂邊地新與法人  
商議改正者迥然不同特恐法使無理狡執出於意外  
一時遽難定議臣與王之眷密切籌商竊擬就圖畫爲  
四綫第一綫中越歷來分疆舊址第二綫將中國老界  
酌議先行認還一半於邊海大勢尙不甚失第三綫於  
老界內最切近者先行勘認數處餘再商辦第四綫卽  
現界近內地方乃近年來中朝涵容藩服未經詳辨確  
認之界也總之第一綫乃中華舊壤土應我屬民應我

護並非格外爭多卽萬不得已第二第三兩綫亦當力  
辨堅持方不致棄所固有如此則自遠而近較有層次  
屆時當相機辨論隨時請旨辦理彼雖貪狡當亦有就  
我範圍之處且卽老界尙待勘明現界亦不至更從剝  
削謹繪圖分綫並將十證繕列清單恭呈御覽相應請  
旨飭下總理衙門暨勘界大臣鄧承修北洋大臣李鴻  
章查照圖證界址與駐京法使暨勘界法使逐條勘論  
務使舊界得以辨認收還不致全行淪棄海疆幸甚邊  
氓幸甚

旨該衙門知道單圖併發欽此

謹將欽州與越南接壤地方查係中國老界詳列確證  
十則以備辨認繕列清單恭呈御覽

第一證分茅嶺爲中國界分茅嶺在州西南三百六十里屬貼浪都古森峒地爲漢將軍馬援唐節度使馬總立銅柱之所銅柱在新安州外相傳山脊生茅南北異同乃中國與交址分界處見歷代史書圖經及一統志省府州志

第二證三不要地爲中國界三不要地在分茅嶺北與十萬大山接雍正五年戶部議准廣東總督孔毓珣奏廣東廉州府欽州西北地名三不要與廣西之上思州安南之河口接壤與廣東龍門協相近請歸併欽州以

便就近撫綏而該地有三村曰白鷄白鵠白灘又有土  
名曰北崙最爲險要請於龍門協派撥千總兵丁設汛  
防守巡遊彈壓從之

見東華續錄

第三證十萬大山以南循丈二河兩岸南抵新安州濱  
臨大海皆爲中國界十萬山在州西北丈二河在州西  
南至新安州入海乾隆二年巡撫楊文乾批飭欽州囑  
鷄松徑等村夷人歷來未征輸漸凜羅浮等八峒因山  
岡磽瘠歲只納丁銀四十兩前人立法深得撫綏羈縻  
之道毋庸報墾升科等語查八峒卽包分茅丈二萬畝  
新安在內河東之峒中永安雁慕潭下河檜河西之新

安舊街直抵海口皆屬貼浪峒境是該處皆爲欽州完

納丁賦之地

見廉州府志記事門

第四證新安州江口爲中國界新安州今土人稱爲先  
安在州西南其江發源於十萬大山沿大二河而下入  
於海有雲屯海鎮在新安府雲屯縣之雲屯巖內海中  
番舶舟船多聚於此永樂中設市舶提舉司

見方輿紀要及廉州

府志經政門

第五證思興水西岸潭下河檜六虎村一帶爲中國界  
潭下河檜六虎村均在州西南思興水之西新安江口  
之東潭下又名大潭河檜又名下街六虎村又名駢六

村屬貼浪都今越人私稱爲萬甯州其地士子多入欽

州學籍及保獎捐輸議敘職員累世廬墓在此

見明萬歷三十

八年峒長分單及欽州學冊五  
峒紳耆廩貢生王永儒等稟

第六證古森港海口爲中國界古森河今名古森港在

州西南距東興十餘里明宣德間欽州峒地入安南嘉

靖二十一年王寅莫登庸納款還侵地遣指揮王相劉

滋知州文章經歷姚明相畫定疆界思勒以潭鱗溪爲

界河洲以砦溪江爲界澌凜以三歧江爲界古森河爲

界

見廉州府志建置  
鄉都門及疆域圖

第七證澌凜峒三歧江海口爲中國界三歧江在州西

南源自思興小水東南流出東興口分爲三道一繞碓  
街之後一經岳山萬注之北一南行出古森港入海查  
明嘉靖間收回侵地漸凜以三歧江爲界又漸凜峒南  
至大河爲界卽指此

見廉州府志及明嘉  
靖十一年峒長分單

第八證碓街爲中國界碓街在州西南東興僅隔一小  
溪爲佛淘涇巡司地明宣德間黃金廣等以漸凜羅浮  
河洲古森思勒五峒佛淘涇巡司屬地附黎氏嘉靖壬  
寅歸還今碓街五里有佛淘巡撫舊署水驛遺址近年  
越人始私稱海甯府按一統志欽州西南二百四十里  
有甯海廢縣舊址唐屬陸州蕭梁曰海南郡以在海南

有陸路通海北故名正與今東興與砦街帶水之隔相

符越之海甯府本於蕭梁之海甯郡似無疑義再砦街

之北有山名長山山下有村名長山村屬羅浮峒地與

松柏隘接

見明萬曆三十八年峒長分單鹽一統志  
廉州府志建置鄉都門欽州志古蹟門

第九證江平黃竹爲中國界江平黃竹在州西南距思

勒十里距防城三十餘里去州城約一日程明崇禎間

係潘土目將田土私賣與越民爲業並無官文書案據

見峒長後裔輔文等公稟

黃

江平爲欽州安良社地今猶名安良街

見明萬曆三十八年峒長分單街門刻字現存

黃

江平五方雜處漳泉惠潮人最多

多乾隆二十年知府周碩勛請移州判署於思勒以稽

察江平

見廉州府志藝文門

江平民人何殿舉賣與熊昌屋契乾

隆間經欽州州判判斷

見欽州州判署檔案現經委員調驗此契與原案同

第十證海面快子籠青梅頭以南至九頭山附近諸島

皆爲中國界諸島皆在州西南爲大洋中越相接之處

所居皆係華人並無越官越兵駐紮查九頭山卽狗頭

山同治九年十二月前兩廣總督瑞麟因欽州洋面鄰

接亞婆溝狗頭山等處向爲洋盜窩聚之所除派兵勦

捕外照會越南國王派兵會勦旋接該國王呈覆下國

廣安海分原無亞婆溝狗頭山等名號現派工部署參

知阮文遂等管帶師船往廣安省之白藤江按截等候

等語是自藤江口以外海中諸島並非越境所轄其爲華界無疑

見同治十年正月十一日越南國王呈覆原文現存兩廣督署有案

謹按欽州邊越之地有三都八峒曰如昔都時羅都貼

浪都如昔峒時羅峒貼浪峒思勒峒河洲峒羅浮峒澌

凜峒古森峒是三都可統八峒故有稱都不稱峒者要

皆厯向中國納賦聽訟應試之地其西北之分茅嶺屬

古森峒爲漢唐立銅柱之所其西南之新安州屬貼浪

都爲明設市舶司之所三歧江等處屬澌凜峒砦街等

處屬時羅都爲明設佛淘逕巡司之所江平黃竹等處

屬思勒峒爲乾隆間議移設州判之所自明宣德間黃

金廣擅以五峒佛淘涇巡司附黎氏嘉靖壬寅莫登庸納款還侵地而江平黃竹復爲潘土目所私賣官吏未及深究國初以遷海之禁近海居人較稀越民漸多雜處雍正五年始正三不要北峯之界華民漸復故居江平一隅閩廣人尤夥故乾隆間有移東興州判於思勒以稽察平江之案近年越人私設土目因蕭梁海甯郡之稱設海甯府又設萬甯州等名號並無明文至邊越峒地雖間有納稅於越者據乾隆二年巡撫楊文乾批牘則指明八峒皆爲欽屬歲共納丁銀四十兩母庸報舉升科尤爲明白無疑查北起十萬山南循丈二河兩

岸直抵大海西包新安州皆在八峒之內卽古森貼浪  
澌票河洲諸峒之境土民人人皆知我朝免其贋畝升  
科而令其納丁銀不過體恤邊氓並非棄之度外嗣後  
峒民自墾間納越稅乃係越人之誤不得因越之違法  
私徵遂謂欽州厯有丁銀之地應入於越也故丈二河  
東之河檜潭下等處河西之新安舊街等處華民十居  
其九或取入州學或獎敘職員學冊部照廬墓契券厯  
歷可據至九頭山越人自謂非其所有現有該國王呈  
文足據綜此十證確爲中國老界無疑今勘認中國老  
界自新安州以東皆應辨明認還若分茅古嶺及岳山

萬注以東碇街江平黃竹石角句冬山腳等處插入腹地圖籍案卷炳然可稽則辨認尤不容含混者也竊擬將欽越交界地圖分爲四綫第一綫西北起十萬大山三不要地分茅嶺跨丈二河兩岸歷東岸之峒中永安雁慕平寮西岸之舊街新安州至新安江口入海海中包雞頭山抬山諸島至大洋止第二綫西北亦起十萬大山三不要地分茅嶺厯峒中丈二河沿思興水之西里火馬頭山腳六虎必那大嶂大小茅山下棠潭下河檜海中包快子籠青梅頭副大門九頭山諸島至大洋止第三綫西北亦起十萬大山三不要地分茅嶺峒厯

中橫抵思興小水沿思興水之東循河而下出三歧江  
口包石夾岳山萬注碇街竹山江平萬尾黃竹石角句  
冬山腳海中亦包快子籠青梅頭九頭山諸島至大洋  
止第四綫則近年中越接壤未經詳辨確認之界也卽  
使第一綫地界暫未能遽行劃還其第二第三兩綫西  
北猶收十萬大山三不要地在內東南遠則包潭下河  
檜近猶包碇街江平在內洋面猶包快子籠青梅頭副  
大門九頭山在內尙存舊日水陸險要界限亦較分明  
與雍正年間部案乾隆道光同治以來地方賦稅學籍  
各案亦尙相符其應如何勘認之處伏候聖裁

密陳于蔭霖才堪大用片

光緒十七年十月二十  
四日

再升任臬司于蔭霖到粵以來事事能舉其職其嚴治盜匪一洗從前彌縫拘攀之習最爲治粵急務清釐訟獄勤求民隱於劣員猾吏濫紳訟棍悉心按考一繩以法厓岸嚴峻請託不行蒐拔人材如恐不及臬司向兼營務處於防營兵食諸事隨時贊助知無不言遇有洋務事體與之籌商類皆批隙導窾旣能力顧本源復能通達時勢凡臣所銳意整飭之事無不實力推行臣有籌計未當之處無不遇事規益志同道合坐言起行屬吏有定趨法令無隔閡近數月來吏習似已大爲轉移

捕務亦已得其要領如該司之持正秉公宏達剛斷不獨爲粵省第一賢員察其才器不凡洵堪大用今將去粵僚屬士民同聲戀惜微臣尤覺頓失臂助焦慮傍徨伏思廣東華洋錯處邊海兼防而吏治疲敝盜匪橫行積毒已久在各直省中首稱難治僅有守者不足以懲官邪除民害僅有才者不足以變風氣服羣情如該司之才望設施適爲粵省對證之藥現在粵省近有察吏詰奸之本務遠有籌邊防海之宏規若無賢才誰與爲理該司已蒙簡擢其才品早在聖鑒之中將來自必游膺重寄宸衷自有權衡惟是粵省當百端交集之秋值

甫有轉機之日臣承乏海疆恩深責重種種緊要實在情形亦何敢不據實上達在該司莅不習之滇省未必卽有速效可觀而粵遽少得力大員未免前功頓棄朝廷瞻懷南服必蒙照察無遺臣爲地方利害起見披瀝密陳伏祈聖鑒

旨留中欽此

密陳瓊防人才片

光緒十二年十月二十六日

再瓊州海外孤懸密邇越界水土毒惡地瘠民貧穀米仰給腹地外而防海內而防黎儋州臨高澄邁一帶又須兼防客匪加以游勇莠民勾結滋擾皆爲心腹之患

歷年瓊民困於殺掠瓊餉竭於屯防外侮內患交迫兼營實非經久之計現屢接提督馮子材電稱已經攻克什密老巢勦平黎首陳鍾明一股從前滋事客匪亦經懾服就撫容俟另摺詳奏惟黎山尙未開闢其中種類繁多未通聲教大軍一撤又慮出巢肆擾重煩兵力惟有欽遵本年正月二十二日寄諭將該黎人設法化導變獠狉爲馴擾始爲一勞久逸之計如能逐漸歸化納土編氓則因其頭目以省兵力息其殺掠以安土民開其鑛利以徠商賈蕃其雜糧以資軍食內安食足而後可言防海查兵部侍郎曾紀澤原奏稱近日瓊州情形

較之臺灣尤爲喫重法人旣據全越卽不能忘情於瓊州在我宜增瓊州之守備以杜法人之覬覦等語洵爲深明形勢切中肯綮之論是今日籌瓊之要以治軍防海爲歸宿而必自撫黎開山始惟是大軍深入事機頗順而黎情未得化導難言善後事宜更未能卽時就緒必須選閔通堅卓之大員任以地方重寄親厯巖峒周察習俗通其情性布以恩威束以條教令其熟者爲我用生者不爲我患則黎通而瓊安矣然此非尋常監司之比必破格而後可言得人必得人而後可言關土聖諭所謂經久之計未雨綢繆無過於此查雷瓊道一缺

向由內地揀員調補臣於粵東實缺道員內逐加體察  
實無堪調之員如督糧道王之春才具優長智慮缜密  
熟諳營務前曾署理雷瓊道在粵省各道中極爲出色  
之員惟該道向係統帶湘軍該軍戍瓊兩年不習水土  
營官弁勇病沒纍累故歷年只在附近州縣地方防截  
斷不能深入黎峒該道現經調回內地署篆高廉自未  
便再令前往此外更難其選臣悉心思查有山西汾  
州府知府朱采廉勁果毅勤樸耐勞器識甚閔志趣甚  
遠久在北洋深通洋務臣在晉時深悉其才其所區畫  
設施旣不爲淺陋凡近之圖亦絕無蹈空粉飾之弊現

在瓊事緊要如蒙天恩破格擢用畀以事權必能披榛闢莽爲國家完此奧區粵防大局亦得犄角無慮實於邊海皆有裨益又卸署兩廣鹽運使廣西候補道蔣澤春守潔才練明澈精詳老於戎行厯在廣西辦理苗疆土司各匪俱能措置妥帖其與撫黎等事情勢相同於斯缺亦能勝任理合據實密陳以備朝廷任使  
旨留中欽此

查覆大南沙築圍一案摺

光緒十二年十一月二十五日

竊臣於上年承准軍機大臣字寄光緒十一年三月十九日奉上諭有人奏廣東頻遭水患皆由土豪占築圍

壩牟利所致現聞順德縣人胡玉林卽胡傳盛串通劣  
紳羅家言賄託香山縣知縣蕭丙堃領批圈築大南沙  
田數百頃迨各業戶赴沙踏勘胡玉林膽敢率眾放槍  
幾釀巨案請飭查辦等語私築圍壩壅塞水道例禁募  
嚴若如所奏胡玉林等強築武斷漁利殃民實爲閭閻  
之害著張之洞倪文蔚按照所奏各節澈底查辦據實  
覆奏等因欽此當經行司委員澈底查辦並據封職何  
太英陳言羣職員胡祖彝等以胡玉林霸築勒收舉人  
黃玉書以何太英逞勢故害等情先後具控經候補知  
府金桂馨前赴順德大南沙勘訊明白因兩造纏訟不

休復經委員前署督糧道李蕊親赴該沙查勘稟覆飭  
催廣州府知府孫楫提訊斷結嗣據該府以飭縣查明  
各情兩造延不到案申覆正在催提間本年十月內據  
在籍戶部候補主事羅家勤翰林院編修黃玉堂及官  
紳舉貢等八十九人聯名呈控何崇光之胞姪何祖榮  
兄弟倚恃侍御之勢包匪挖壳傷害農田毆辱約紳等  
情監生何祖榮訴詞亦許護沙約諸紳謂因築大南  
沙圍挾嫌誣控復據黃玉書等呈控何太英串同姻親  
陳言羣等糾黨串噬恃符匿審密囑其子妄奏等語復  
委署督糧道閻希范親赴順德督同兩司委員知府萬

方輝知縣陳藻順德縣知縣魏傳熙香山縣知縣張文翰等併案查訊飭司覆核茲據東按察使于蔭霖會同東布政使高崇基署督糧道閻希范詳稱查大南沙築圍被參一案如原奏內稱胡玉林等串賄霸築漁利殃民各節查大南沙築圍係舉人黃玉書倡首有香山縣原稟及各控案可證胡玉林雖亦在事不能主持並非倡築原奏內謂築圍阻塞水道一節查圍多方能阻水不能歸咎於大南沙一圍勘明該沙西南面有光緒四年麥汝良等所築之罟步圍西面有光緒四年胡承勳所築之牛角圍北面有光緒七年何太英等所築之

浮墟圍皆與大南沙毗連黃玉書等議築係仿效三圍辦理又原奏內稱每畝勒收圍底銀二兩餘每畝扣實田八釐及串紳羅家言賄通香山縣知縣蕭丙堃批准一節查黃玉書等築大南沙議每畝收圍底工費銀二兩六錢五分扣提涌佔田六釐亦均係沿襲上三圍舊規絲毫無異黃玉書等沿案請築蕭丙堃沿案批准似無須羅家言從中賄通又原奏內稱圈築大南沙田數百頃並未向各業戶商允各業戶赴沙踏勘胡玉林放槍拒逐幾釀巨案一節查大南沙共有潮田三百餘頃現經黃玉書等圈築僅有七十餘頃只及四分之一此

次稟築大南沙圍已據黃玉書黏呈各業戶簽名知單  
三紙計二百八十九戶又經護沙公約出長紅通知并  
無一人到約說及不願築圍是未向業戶商允一層實  
無所據雖有陳言羣胡祖彝等構訟皆係有爲而爲不  
允既非公論阻築亦非實情當圍工將竣時何太英雇  
蟹民數十人連船駛至大南沙欲將該圍挖毀值圍上  
工作人衆以致彼此口角爭鬧并非出自業戶亦無放  
槍拒逐情事至原奏內所稱築圍牟利先許劣紳出稟  
謝資若干分溢田若干酬袍金若干謂之挂銅錘乾食  
麪等項名目一節查此等陋習從前築罟步牛角浮墟

三圍均所不免亦不獨築大南沙爲然此查明大南沙築圍一案並無阻水串賄放槍拒逐各節之實在情形也又查何太英夥同其戚陳言羣等與黃玉書疊次互控一案何太英等呈一則謂沙棍倚豪霸築鍬傷稅業再則謂築圍將使肥田變瘠三則謂攬抽圍底溢田徒飽棍徒慾壑獨不思該封職倡築浮墟沙圍九十餘頃其事甫逾五年其地僅隔一涌大南之築皆由浮墟作俑何得以已所曾爲之事覲顏責人前經在廣州府呈遞和息又行復控謂黃玉書不遵照合約割田補價等語經該道調閱合約尾係陳言羣之子副貢生陳廷

顯代父簽名誠有議割換田十四頃一條訊據何太英  
供稱已分只有田二十餘畝在圍陳言羣供稱已分只  
有田六十餘畝在圍乃約內令割田十四頃計一千四  
百畝其爲包攬別業挺身扛訟顯然易見且合約內云  
議明聽業戶揀擇不要受水冲射之田自是以瘠易腴  
何以約內另條反令補田價銀三千兩旣云田價何以  
約內云所欠田價三千兩立單作爲泛常貿易揭充本  
錢約內所稱立單共銀五千一百五十兩除田價三千  
兩尙有二千一百五十兩又作何項之用約內又云交  
銀後務與何封翁出力辦妥銷案並云入控到堂者日

後減收圍底銀一半附控未到堂者減收圍底銀四分之一附控者尙得以次沾利則倡首扛訟者獨享其贏可知種種詭謬貪橫合約內已自和盤托出現據黃玉書等供稱已交何太英銀一千七百兩據陳廷顯供認收入大南公所不諱勒索已有確據至胡祖彝胡尙儻胡廷鎔等訊據供稱該族姪有田四百餘畝被黃玉書等霸築在圍願另拆出查該田中邊俱有何能拆出現圍已築成勢必將全圍拆毀該職員並非真欲拆出明係見何太英詐索得利競起效尤外則挾黃玉書等以賄和內則藉收族人之訟費亦無非爲乘機涎利起見

至黃玉書等築大南沙圍以數百戶共有之業倡爲興  
築先稟請築五十頃後推擴至七十餘頃實爲多收圍  
底多扣溢田之計雖踵效罟步浮墟之故套而牟利則  
一查現圈築之田共有七十七頃零計收圍底可得銀  
二萬零二百餘兩九四交田可溢田四頃六十六畝零  
除圍基涌道應佔去田二頃八十畝尙餘溢田一頃八  
十六畝零每畝約值三十兩計所得溢田可值銀六千  
餘兩統共可得銀約二萬七千兩雖據黃玉書等供稱  
築圍實用工本銀一萬四千餘兩訟費及交何太英之  
銀尙不在內墊資甚鉅現因訟案未結圍底銀分毫未

收溢田亦未扣清而意在藉公營私致使強戶覬覦藉口興訟亦屬咎由自取竊思大南沙圍旣築成若遇水潦盛漲圍中田畝不受浸灌各業戶亦自均沾利益儻果有不便何太英等何不控於甫築之時而控於築竣之後且圍中業戶數百家獨何陳胡數姓纏訟不休各姓均少赴控顯係爭強漁利一切換田拆田控請毀圍之說皆爲假託現經該道於訊明後飭令凡在圍中業戶各守原址各安已業不准以割換拆出爲詞致使強戶取羸弱戶喫虧何太英陳言羣等詐贓五千餘兩除立單未支之銀不准索交其交銀一千七百兩飭令順

德縣追繳充公黃玉書等核計將來所收圍底溢田除  
歸還墊本餘利約有銀一萬三千兩俟明年開收後飭  
將餘利銀一萬三千兩全數提出罰繳充公乃黃玉書  
自知認過具結遵依而何太英雖理屈詞窮恃老恃勢  
一味橫蠻抗不遵斷致陳言羣胡祖彝等因亦從而違  
抗此查明大南沙築圍互控實因一則意圖沾潤一則  
恃勢婪索現經勘明訊斷一遵一抗之實在情形也又  
查何祖榮被控挖蠔傷田莊匪毆紳一案據聯名原呈  
內何崇光之姪庠生何祖康與弟何祖安何祖榮倚勢  
包匪挖壳到處傷人田畝復督匪艇數十艘向神步臺

經禁海道肆挖本邑護沙公約禁止弗恤九月初三日臺勇及沙艇拏獲壳匪陳亞銀等七名挖壳鐵具十餘件何祖康兄弟贍率壳匪多人到臺搶奪適臺弁已將壳匪繞道解約竟將臺內旗幟器械毀散隨闖進護沙公約大肆咆哮聲言我侍御第作事誰人敢管要將壳匪搶去約紳前江西上饒縣知縣區作霖勸阻竟敢毆傷右目當將壳匪解縣區作霖傷亦驗明伏查何侍御第父兄橫恣子弟效尤欺民藐官素無畏憚今搶匪鬧約更將老成紳士毆傷藐法兇橫實爲歷來世家所未經見士林聞之無不切齒集縣明倫堂會議咸謂公論

真在國法宜彰緣岸蠔壳所以保護沙田該縣護沙約  
公議禁止挖蠔係屬歷年成案何崇賢身列約紳乃其  
子何祖榮等率匪挖蠔鬧約索匪致將區作霖毆有微  
傷有臺勇葉萬青目擊爲證經順德縣知縣魏傳熙驗  
明傷痕如謂黃玉書一人與之有嫌與八十餘紳何涉  
已據邑紳羅桀龍景愷潘玉璿羅家勤羅彤熙楊康等  
到案訊明眾供如一僉稱何祖榮等庇匪毆紳係所親  
見伊家倚言官之勢不法之事甚多此其一端等語傳  
訊何祖榮等始猶以偶從神步臺經過聞艇呼聲因往  
解散并非包庇爲詞及提陳亞銀等面質供係聽何四

少使令何祖榮乃無詞可辯復據委員萬方輝陳瀛藻查明覆稱何祖榮等平日包匪挖壳每年收壳艇規銀至千餘兩此次鬧約其叔何崇德並要糾人搶奪幸得邑人阻止否則幾釀大事區作霖被毆激動閩邑公憤赴明倫堂簽名集議者至三百餘人等語尤可異者此案既控之後何祖榮赴臬司控辯並不遵例遣抱具呈公然以何太史第函封投並夾入伊胞叔何崇光新升給事中紅報單一紙投進以此二節證之不獨此案包規庇匪毀約毆紳其平日種種恃勢橫行已可概見黃玉書控稱何太英密囑其子妄奏等語恐非無因此查

訊因大南沙築圍滋成挖壕一案之實在情形也統查築圍挖壕兩案始末情形加以博采輿論順德閩縣皆以爲咎不在何太英何祖榮等而實在何崇光平心論之大南沙久成奏案何崇光身居諫垣不應不知其父及子姪親戚藉大南沙索詐蔓訟何崇光亦不應不知自宜婉切貽書勸戒其父兄約束其子姪令此事早爲處息方爲無愧科目朝紳之選乃經此案入奏之後其父岳子姪勢焰加張揚言鄉里若惟恐人之不知並不稟請差拘而何太英擅細職員胡心如解省並不繕呈遣抱而何太英徑行面遞此案節略於前藩司龔易圖

之前今且愈橫愈甚至公然投報紅遞訟函駁駁以勢  
力凌挾官府陳言羣係何崇光之妻父結黨樹幟助勢  
索銀供認不諱其稟內有經言官參奏章墨未乾等語  
顯係隱有所挾查何太英不過一微末武弁近年雄視  
一鄉父子祖孫相率強霸其著有控案者其第四子崇  
賢以強霸稅田爲婦婦梁胡氏所控其孫桂芳以扛佔  
沙田爲貞婦潘吳氏所控其第七子崇烜以扛幫霸耕  
畠田搶割桑禾幾釀巨案爲周殿樞所控綜考一門衆  
案種種暴橫然則閩縣公論歸咎於縱使之人何崇光  
亦殊難以自解也此案何太英陳言羣之老悖貪橫何

祖榮等之少年狂誕置閩縣水利民生於不恤藐公論國法於不顧種種妄爲厥咎均有難恕然探原論事無非恃有身列諫垣之人應請將何太英先行交該地方官嚴加管束其何太英與陳言羣索詐銀兩勒令如數追出充公強立銀單銷燬並將監生何祖榮生員何祖康等分別發縣發學從重戒飭舉人黃玉書築圍浮派銀一萬三千兩悉數遵結充公仍責令該地方官嚴加管束不准再蹈牟利滋訟情事胡祖彝胡廷鑠等如果始終抗斷滋訟再行飭縣嚴懲惟現值清丈沙田之際首宜整頓劣紳把持積習何太英等舉家恃勢婪索抗

斷庇匪歐紳公呈眾論率皆牽涉何崇光此案若不秉  
公裁斷不獨大南沙一案纏訟不休將來於辦理沙田  
之全局大有妨礙至翰林院編修黃玉堂係舉人黃玉  
書之胞兄黃玉書既與何太英互有控案自應引避乃  
控何祖榮等公呈列名在前以致何祖榮等以挾嫌誣  
控爲辭蓋兩案事雖各別衅實相因公呈雖係閩邑紳  
士聯名非僅黃玉堂一人具控究屬不知避嫌似亦微  
有不合惟給事中何崇光編修黃玉堂皆係京官清要  
未便擅加評論亦未敢默不言相應詳請奏明請旨  
分別辦理其何太英之第四子何崇賢其孫何桂芳被

控各節與現控係屬另案應飭縣傳集秉公訊斷另行  
議結其第七子何崇烜查已身故上年案經順德縣斷  
結應予免究等情前來臣查粵省沙田向爲豪紳利藪  
每一沙中皆係有力者出爲首事斂費築圍所派工料  
之數每有浮多名曰圍底又藉堤涌占地之名各業戶  
復於每田一頃中提田六畝以酬首事名曰六釐溢田  
各圍戶人看田名曰沙夫亦名沙骨充沙夫者每名先  
納充規數百元於首事名曰投沙骨此乃順德各沙相  
沿陋習其他縣各沙亦復大同小異蓋由沙田皆係上  
腴類多託名斥鹵延不加升隱匿溢坦抗不首報勢之

所在利卽歸之利之所在訟卽因之訟不能決鬪卽隨  
之此案大南沙築圍被參各款以阻礙水道一節爲最  
要疊據前今署督糧道李蕊閣希范等親往履勘該處  
海汊交錯沙灘分羅並非適當大溜入海之口若論沿  
海各縣各沙俱有圍田致阻水勢理自有之若謂止此  
一沙區區面徑五里身高六尺之圍遂能壅遏狂瀾且  
謂阻及上游數百里外西北兩江之水竊恐近於附會  
且何太英爲首所築之浮墟沙一圍地在其北事在其  
先彼圖不阻水道而獨責此圍所控殊妄至該圍係黃  
玉書倡築胡玉林並非首事築圍之人各業戶現有簽

名願築知單其口角爭鬧係何太英雇人掘圍所致並  
非出自業戶亦無放槍拒逐之事該圍沿案請築該署  
縣蕭內堃沿案批准無所用其賄通現經查明羅家言  
委無串賄之事其圍底溢田之數陋習相沿各圍所同  
黃玉書沿舊派收其築圍工費皆係墊辦尙未收到現  
經飭令俟收齊時將餘利盡數罰繳充公旣無阻水串  
賄釀案各節胡玉林羅家言蕭內堃等應請勿庸置議  
惟查此案構訟實情皆由各欲牟利而起黃玉書沿舊  
浮派本有不合但尙未經入手而何太英陳言羣勒寫  
借單強割腴田訛索已經入手者至一千七百兩之鉅

以何陳兩家之田八十餘畝勒換他戶之田至一千四百畝之多已屬貪橫且黃玉書遵斷罰繳而何太英抗不遵依銷繳息訟尤爲恃勢藐法至順德紳士公呈控告何祖榮等庇匪毆紳一案皆經查訊屬實並查出何崇烜何崇賢何桂芳被控強霸各案以一家祖孫子姪橫行鄉里恫喝官紳致動閩縣公憤且正當委員查訊之際公然以面封訟呈並加給事中報單投送臬司衙門是其一味恃符妄爲罔知法度於臬司衙門如此其於該縣可知其於鄉里更可知現在順德衆憤沸騰僉謂何太英何祖榮及陳言羣等無從深責實由給事中

何崇光庇縱主使所致竊思何崇光身爲言官其是否  
知情臣斷不欲加以苛責惟此起奏案旣因抗斷不結  
被控庇匪毘紳一案又復暴橫日甚現當奉旨查辦沙  
田升科之際法令不行官吏束手臣若委曲徇隱不行  
據實奏聞不惟無以息大南沙一團之鬪訟亦無以服  
順德閩縣之人心相應據實奏明其應如何辦理之處  
伏候聖裁至在籍翰林院編修黃玉堂適當前案未結  
之際亦隨衆列名呈控其疎忽之處似亦稍有不合相  
應請旨交部察議舉人黃玉書沿舊派收圍底溢田並  
未收到現已重罰充公應請免其置議仍交該地方官

嚴加管束其封職何太英陳言羣監生何祖榮生員何  
祖康職員胡祖彝胡廷鑠等應請將何太英先行交地  
方官嚴加管束何祖榮何祖康從重戒飭如果始終抗  
斷不悛滋訟生事以上各名均卽各予嚴行懲辦其何  
崇賢等各案飭縣另行查訊議結至沿海沙田如查有  
實係阻礙水道之處斷不准私行築圍賄串官紳率行  
批准上年七月已經臣會同前撫臣倪文蔚通飭示禁  
在案應再嚴飭禁止以杜流弊

旨另有旨欽此

張文襄公全集卷十八終

吳縣周仰公校